

摘藻堂四庫全書薈要

經部

欽定四庫全書薈要卷二千三百四十六

經部

日講禮記解義卷四十八

喪大記

小斂之衣祭服不倒君無祴大夫士畢主人之祭服親戚之衣受之不以即陳小斂君大夫士皆用複衣複衾大斂君大夫士祭服無算君褶衣褶衾大夫士猶小斂也

此申言小斂大斂之所設也畢盡也夾衣衾有著曰

複無著曰褶小斂之衣不能悉著而裹尸以取其方故有倒領於下者唯祭服尊故必領在上也君斂與所陳悉用己衣而不用襚大夫士用襚然必盡主人之祭服而後用之故親戚之衣受之而不以即陳小斂君大夫士皆用複衣複衾大斂君大夫士唯祭服盡用而無算其餘散衣君用褶衣褶衾大夫士用複猶之小斂也案祭服蓋舉服之尊者而言所用之襚亦指大功以上不將命自即陳於房中者而言若小

功以下親戚之衣但受之而不以即陳未必盡用也袍必有表不禪衣必有裳謂之一稱

此申言稱義也袍衣有著者禪與單同袍為褻衣必有以表其外而不單露衣為上服必有以飾其下而非無裳如此斯謂之一稱張氏曰以其表裏上下之相稱故謂之稱也

凡陳衣者實之篋取衣者亦以篋升降者自西階凡陳衣不詘非列采不入絺綌紵不入



此言陳衣之當辨也。詘與屈同，不詘不卷也。列采五方之正色。凡陳衣者，實之於篋，取衣者亦以篋昭其慎也。升降者，皆由西階從其便也。凡陳衣雖在篋中，必舒而不卷，非列采不以入為其間雜也。絺綌與紵，不以入為其單褻也。案凡陳衣，通指陳於東序房中及庭而言。取謂取之以斂也。賈氏曰：舊說自篋取陳，又謂取衣為收，遜者非。

凡斂者，袒遷尸者襲。

此言斂與遷尸之異也凡執斂之役者則袒衣以從其便若斂畢而遷尸入柩則襲衣而不復袒蓋斂與遷尸事有難易繁簡之不同故袒襲異也

君之喪大胥是斂衆胥佐之大夫之喪大胥侍之衆胥是斂士之喪胥為侍士是斂

此言斂時用人之法也君之喪用大胥以執斂事衆胥佐之大夫之喪大胥但臨侍於旁衆胥為之親斂士之喪胥亦臨侍於旁士之友為之親斂案鄭氏注

曰胥樂官不掌喪事當為祝字之誤周禮大祝大喪贊斂喪祝卿大夫喪掌斂士喪禮商祝主斂是也吳氏澄讀大為太謂大胥是大祝之胥衆胥是衆祝之胥

小斂大斂祭服不倒皆左衽結紱不紐

此言斂衣之法也衽謂衣襟小斂大斂之衣以祭服為尊故不倒領於下衣皆從左衽畢結其紱而不為屈曲示不復解也案祭服不倒明大斂同於小斂左

衽不紐明死時反於生時

斂者既斂必哭士與其執事則斂斂焉則為之壹不食  
凡斂者六人

此言與斂者之節也斂者於既斂躬盡其力即心盡  
其哀而必哭若士之喪曾與亡者共執事則為之斂  
斂焉則為之壹不食又以情重而增哀也凡斂者貴  
賤皆用六人蓋兩邊各三人也

君錦冒黼殺綴旁七大夫玄冒黼殺綴旁五士緇冒黼

殺綴旁三凡冒質長與手齊殺三尺自小斂以往用夷衾夷衾質殺之裁猶冒也

此言尊卑之冒制也冒者韜尸之二囊上曰質下曰殺先以殺韜足而上後以質韜首而下夷尸也裁猶制也既襲之後小斂之前有冒以韜尸君用錦冒畫黼為殺縫合一頭及一邊其不縫之一邊綴旁之帶有七大夫用玄冒亦畫黼為殺綴旁之帶降而為五士用緇冒以赭色為殺綴旁之帶降而為三凡冒之

制質自首韜下其長與手齊殺自足韜上其長三尺  
此小斂以前之所用自小斂以後衣多不可冒則用  
夷衾以覆尸蓋夷衾與質殺之制等之乎為覆冒尸  
形而作也案專言冒則質殺皆在其中對殺而言冒  
即是質

君將大斂子弁經即位于序端卿大夫即位於堂廉楹  
西北面東上父兄堂下北面夫人命婦尸西東面外宗  
房中南面小臣鋪席商祝鋪絞紵衾衣士盥於盤上士

舉遷尸於斂上卒斂宰告子馮之踊夫人東面亦如之  
此言人君大斂之禮也弁經素弁加經未成服故也  
序端謂東序南頭堂廉謂堂基南之廉稜處上士卽  
商祝之屬宰謂大宰君將大斂其子弁經卽位於東  
序之端卿大夫卽位於堂廉楹西北面而以東為上  
諸父諸兄之不仕者在堂下北面夫人及命婦在尸  
西東面外宗在房中南面於時小臣鋪席商祝鋪絞  
紼衾衣於席上士盥手於盤上士從堂上舉尸而遷

於阼階斂處迨卒斂大宰告子以事畢子馮尸起踊  
夫人東面亦如之孔氏疏曰士亦喪祝之屬周禮喪  
祝上士二人中士四人下士八人

大夫之喪將大斂既鋪絞紼衾衣君至主人迎先入門  
右巫止於門外君釋菜祝先入升堂君即位於序端卿  
大夫即位於堂廉楹西北面東上主人房外南面主婦  
尸西東面遷尸卒斂宰告主人降北面於堂下君撫之  
主人拜稽顙君降升主人馮之命主婦馮之士之喪將



大斂君不在其餘禮猶大夫也

此言大夫士大斂之禮也。巫止門外者，君臨臣喪，巫來以辟凶邪也。大夫之喪，將大斂，既鋪絞衾衣於席，君親至臨視，主人出迎，即先還入於門右。巫者止於門外，君釋菜以禮門神，於是祝先入升堂以導君。君即位於序端，卿大夫即位於堂廉楹西北面，而以東為上。主人立東房之外，南面。主婦立尸之西，東面。乃遷尸於斂所，迨卒斂，宰告主人，以事畢，主人自西。

階而降立於堂下北面以待君君撫尸而與之別主人拜稽顙君降階升主人馮尸并命主婦亦馮尸若士之喪將大斂則君不臨視其餘如鋪衣列位馮踊諸禮亦猶之乎大夫也徐氏師曾曰若君賜大斂則其禮亦如大夫但中加主人降出三節見後章及儀禮

鋪絞紼踊鋪衾踊鋪衣踊遷尸踊斂衣踊斂衾踊斂絞紼踊

此言子踊之節也孝子居喪踊節有七鋪絞紵則踊  
鋪衾則踊鋪衣則踊遷尸則踊斂衣則踊斂衾則踊  
斂絞紵則踊此為君大夫士所同者案此專以大斂  
之時而言若動尸舉柩哭踊無數者又別

君撫大夫撫內命婦大夫撫室老撫姪娣君大夫馮父  
母妻長子不馮庶子士馮父母妻長子庶子庶子有子  
則父母不馮其尸凡馮尸者父母先妻子後君於臣撫  
之父母於子執之子於父母馮之婦於舅姑奉之舅姑

於婦撫之妻於夫拘之夫於妻於昆弟執之馮尸不當  
君所凡馮尸興必踊

此言馮尸之節也內命婦君之世婦也撫之者當尸  
之心胃處撫按之執之者執持其衣馮之者身俯而  
馮之奉之者捧持其衣拘之者微牽引其衣皆於心  
胃之處也臨喪而馮其尸雖出於情之所不能舍然  
其節必因人而有異君則撫大夫撫內命婦大夫則  
撫室老撫姪娣皆以其貴也君大夫則馮父母妻長

子而不馮庶子士則馮父母妻長子庶子若庶子有子則父母不馮其尸凡馮尸者父母在先妻子在後以尊卑異也君於臣則撫之父母於子則執之子於父母則馮之婦於舅姑則奉之舅姑於婦則撫之妻於夫則拘之夫於妻於昆弟則執之假令君已撫心則馮尸不敢當君所撫之處又凡馮尸者起必為踊以傷之至而泄其哀也吳氏澄曰總言之皆謂之馮尸分言之則有馮奉拘撫執五者之異撫在拘執之

間

父母之喪居倚廬不塗寢苫枕由非喪事不言君為廬  
宮之大夫士檀之既葬柱楣塗廬不於顯者君大夫士  
皆宮之凡非適子者自未葬以於隱者為廬

此言居廬之禮也倚廬喪次名聶氏崇義曰凡起廬  
先以一木橫於墻下去墻五尺臥於地為楣即立五  
椽於上斜倚東牆上以草苫蓋之其南北面亦以草  
屏之向北開門苫草苫由土塊也柱與柱同梁謂之

楮人遭父母之喪居則於中門外東墻下倚木而為廬以草夾障不用泥塗所寢則苫所枕則凶非喪事則口不以言君為廬以帷障之如宮牆然大夫士則袒露之而無帷障既葬哀殺乃拄起其楮令稍寬以受日光又用泥塗以辟風寒而不塗廬外之顯處自此則君而外大夫士皆以帷障而宮之不復袒矣凡適子之禮如此若非適子者自未葬時惟於隱者為廬而已鄭氏注曰於隱者為廬不欲人屬目蓋廬於

東南角既葬猶然

既葬與人立君言王事不言國事大夫士言公事不言家事君既葬王政入於國既卒哭而服王事大夫士既葬公政入於家既卒哭弁經帶金革之事無辟也

此言喪禮有經權之異也王事天子之事國事一國之事公事即國事也弁經帶謂素弁加環經而帶則仍要經也既葬之後如與人並立國君可言王朝之事而不言國事大夫士可言國之公事而不言家事



此禮之經也若君於葬後有王政入於其國既卒哭而即出服王事大夫士於葬後有公政入於其家既卒哭而變喪服為弁經帶即於金革之事無辟此禮之權也

既練居堊室不與人居君謀國政大夫士謀家事既祥黝堊祥而外無哭者禫而內無哭者樂作矣故也

此言練與祥禫之節也練小祥祥大祥也既練之後孝子居堊室猶不與人居國君可以謀國政大夫士

可以謀家事既祥之後則黝治其地令黑堊塗其壁  
令白以吉之先見故致飾以變其凶於是祥而中門  
之外無哭者禫而中門之內無哭者蓋祥之日鼓素  
琴禫則已縣八音於庭樂作矣故也

禫而從御吉祭而復寢期居廬終喪不御於內者父在  
為母為妻齊衰期者大功布衰九月者皆三月不御於  
內婦人不居廬不寢苦喪父母既練而歸期九月者既  
葬而歸

此言居喪即吉之有節也從御婦人御執事也吉祭  
謂四時之常祭三年之喪至禫而服除然後可以從  
御待吉祭畢而後復其私寢其有期服居廬終喪而  
不御內者如父在為母為妻是也餘如齊衰期者大  
功布衰九月者亦皆三月不御於內婦人為舅姑與  
其夫次於中門之內不居廬不寢苦其喪父母則既  
練而後歸其有期服因出嫁降服大功九月者則既  
葬而後歸凡以自致其情也孔氏疏曰吉祭而復寢

者謂禫祭之後同月值吉祭則祭畢而復寢若不同月則待踰月吉祭乃復寢案喪記言寢者三既練舍外寢謂堊室也又期而大祥居復寢平日之外寢齊與小喪之所次也吉祭而復寢燕私之寢也父在為母為妻不言祖父母何也母與妻疑為父在而屈者也祖父母之伸則不以父在為疑也

公之喪大夫俟練士卒哭而歸

此言臣居君喪之禮也公之喪大夫俟練而後歸士

則卒哭而歸柩此當與雜記互觀之均之大夫也而有次於公館以終喪者有俟練而歸者均之士也而有練而歸者有卒哭而歸者親疎貴賤不同也鄭注以公之喪為士大夫有采地者未是

大夫士父母之喪既練而歸朔月忌日則歸哭於宗室諸父兄弟之喪既卒哭而歸

此言庶子居喪而歸之節也宗室宗子之家謂殯宮也庶子之為大夫士者居父母之喪既練而各歸其

宮及朔月忌日則歸哭於宗子之室若諸父諸兄弟之喪則既卒哭而歸案大夫士之家適庶不同居故庶子之為大夫士者至小祥而歸適子則終喪在殯宮也

父不次於子兄不次於弟

此言尊者不就卑幼之殯宮為次也父之於子恩雖重而尊不臨卑故不居於子之殯宮兄之於弟情雖篤而長不下幼故不居於弟之殯宮案兄不次於弟

謂庶弟也若適弟則庶兄為之次上所謂既卒哭而歸是已

君於大夫世婦大斂焉為之賜則小斂焉於外命婦既加蓋而君至於士既殯而往為之賜大斂焉夫人於世婦大斂焉為之賜小斂焉於諸妻為之賜大斂焉於大夫外命婦既殯而往

此言君與夫人恩賜弔臨之禮也世婦內之命婦也外命婦大夫妻也諸妻疏謂娣姪及同姓女也君於

大夫世婦之常禮均視其大斂焉惟為之加恩賜則并視其小斂焉若於外命婦當入棺加蓋之後而君始至無復加賜於士之常禮當既殯而後往惟為之加恩賜則視其大斂焉夫人於世婦之常禮亦視其大斂焉惟為之加恩賜則并視其小斂焉於諸妻惟為之加恩賜乃視其大斂焉於大夫外命婦當既殯而後往方氏慤曰小斂在先大斂在後喪事以速為敬故大斂而往者則為禮之常小斂而往者則為之



賜也

大夫士既殯而君往焉使人戒之主人具殷奠之禮俟於門外見馬首先入門右巫止於門外祝代之先君釋菜於門內祝先升自阼階負墉南面君即位於阼小臣二人執戈立於前二人立於後擯者進主人拜稽顙君稱言視祝而踊主人踊

此言君弔大夫士始至之禮也殷猶大也稱舉也言弔詞也君於大夫士有既殯而往焉者則使人告戒

主人使知之主人具殷奠之禮出候於門外見君車  
前之馬首先入而立於門右巫者止於門外祝代巫  
先於君釋菜以禮門神之時祝先升自阼階至房戶  
之東背壁而南面自是君即位於阼小臣二人執戈  
立於前二人立於後擯者進而相禮主人北面拜稽  
顙於庭君舉弔詞視祝踊而踊主人亦從而踊案君  
於大夫視大斂於士則既殯而往今同大夫於士者  
殆以有他故不及斂而至是始往與

大夫則奠可也士則出俟於門外命之反奠乃反奠卒  
奠主人先俟於門外君退主人送於門外拜稽顙

此言君於大夫士方奠卒奠之禮也若是大夫之喪  
則當君在阼時主人即以所具殷奠奠於殯可也若  
士之喪主人即不敢留君待奠踊畢則先出俟於門  
外若將送君者必君命之反奠乃敢反奠既卒奠主  
人又先俟於門外迨君退則主人送於門外拜稽顙  
案奠畢出俟蓋大夫與士之主人皆然

君於大夫疾三問之在殯三往焉士疾壹問之在殯壹往焉君弔則復殯服

此言君於大夫士問弔之禮也殯服謂未成服之服苴經免布深衣不散帶也君於大夫之疾三問之其在殯亦三往焉於士之疾壹問之其在殯亦一往焉若君來弔或不當大斂與殯之時則還著其殯服蓋不敢以君之弔後時又且以君來故新其禮也

夫人弔於大夫士主人出迎於門外見馬首先入門右

夫人入升堂即位主婦降自西階拜稽顙於下夫人視世子而踊奠如君至之禮夫人退主婦送于門內拜稽顙主人送于大門之外不拜

此言君夫人弔臣之禮也主婦臣妻也世子夫人之世子也主人送不拜喪無二主也若君夫人弔於大夫士主人出迎於門外見夫人車前之馬首先入而立於門右夫人入升堂即阼階之位主婦降自西階拜稽顙於下夫人以世子前導因視之而踊其奠一

如君至所行之禮夫人退主婦送於門內拜稽顙以謝主人則送於大門之外不拜應氏鏞曰主人迎而先入門右夫人升而自階待夫人猶待君也主婦拜稽顙於下執妾禮猶臣禮也退則送於門內婦人迎送不下堂而特至門者為所尊變也其來也主人迎於門外送亦如之所以代主婦而伸敬也門外者男子之所有事婦人迎送不出門雖對所尊而不敢變也

大夫君不迎於門外入即位於堂下主人北面衆主人南面婦人即位於房中若有君命命夫命婦之命四鄰賓客其君後主人而拜

此言大夫弔家臣之禮也大夫之臣亦以大夫為君故稱大夫君大夫君弔其家臣主人不迎於門外大夫入而即堂下阼階之位主人在其位之南北面衆主人在其位之北南面婦人即位於房中此時若有本國君命或大夫及命婦之命來弔或四隣賓客來

弔則大夫君在前主人陪置其後於拜竟而亦拜案  
不迎於門外與即位於堂下禮皆貶於正君也其後  
主人而拜者以喪用尊者為主大夫君又不敢如正  
君專代為主故先拜而主人陪後以拜也

君弔見尸柩而后踊

此申言君弔臣之禮也君弔大夫士之喪必見尸柩  
而后踊案前章言既殯而君往視祝而踊與此不同  
者舊說既殯未塗尸柩見於外則踊塗之後雖往不



踊

大夫士若君不戒而往不具殷奠君退必奠

此申言君弔以後設奠之禮也大夫士之喪若君不  
預戒而往其家不及具殷奠則俟君退必奠而以君  
至告於親榮之也張氏曰此錯簡當在前章主人送  
於門外拜稽顙之下

君大棺八寸屬六寸棨四寸上大夫大棺八寸屬六寸  
下大夫大棺六寸屬四寸士棺六寸

此言棺制之等也大棺棺之在表者屬在大棺內棨  
又在屬內棺之重數自上而下降殺以一君之大棺  
厚八寸屬厚六寸棨厚四寸凡三重上大夫大棺厚  
八寸屬厚六寸下大夫大棺厚六寸屬厚四寸凡二  
重士惟棺厚六寸不重孔氏疏曰檀弓從內而說以  
次出外此先云大棺及屬乃始云棨是從外向內而  
說

君裏棺用朱綠用雜金鑠大夫裏棺用玄綠用牛骨鑠

士不緣

此言裏棺之制也裏棺謂以繒貼棺裏孔疏緣定本作琢鐫釘也君之裏棺貼以朱繒用雜金為鐫以琢著於棺大夫裏棺用黑繒琢之用牛骨鐫士則不用釘琢餘悉與大夫同孔氏疏曰雜金鐫者尚書云黃金三品黃白青色舊說云用金釘又用象牙釘雜之以琢繒著棺也

君蓋用漆三衽三束大夫蓋用漆二衽二束士蓋不用

漆二衽二束

此言衽束之數也蓋棺之蓋板也用漆者塗合牝牡之中也束以皮束棺也君之棺蓋用漆以塗合縫之處凡三衽三束大夫蓋用漆止二衽二束士蓋則不用漆亦二衽二束案衽小要也君之棺兩邊各三衽每當衽上輒以牛皮束之故云三衽三束

君大夫髻爪實于綠中士埋之

此言藏髻甲之異也髻亂髮爪手足爪甲也鄭注綠

當為角君大夫之簪爪生時積而不棄死後盛以小囊而實於棺內四隅士則以物盛而埋之蓋身體髮膚受之父母簪爪有所不遺亦猶是全歸之意也

君殯用輜櫨至於上畢塗屋大夫殯以幬櫨至於西序塗不暨於棺士殯見衽塗上帷之

此言殯之制度也輜盛柩之車櫨猶叢也畢盡幬覆暨及帷障也國君之殯以柩置於輜而櫨木於四面以至於上以泥盡塗其屋大夫之殯不用輜亦不為

屋但以棺衣覆之欗其三面而一面貼西序之壁塗以迫近而較慎使不至於棺士之殯不為欗掘坎容棺猶見其蓋縫用衽之處用木覆而塗其上凡殯士達乎君皆帷之以鬼神尚幽闇故也案此言君兼天子諸侯屋謂欗木之形四注如屋也

熬君四種八筐大夫三種六筐士二種四筐加魚腊焉此言熬穀之異也熬煎穀使熟也四種黍稷稻粱也三種黍稷粱也二種黍稷也筐竹器葬須熬穀置於

棺旁君四種分為八筐大夫三種分為六筐士二種分為四筐此外又加魚腊焉舊說煎穀所以感虵蟄不如教氏云孝子不得復奠故置此以盡其心也

飾棺君龍帷三池振容黼荒火三列黻三列素錦褚加偽荒纁紐六齊五采五貝黼翬二黻翬二畫翬二皆戴圭魚躍拂池君纁戴六纁披六

此言國君飾棺之制也帷柳車邊障即所謂牆也以白布為之而畫以龍池織池為籠衣以青布挂於柳

上荒邊爪端振動也容飾也以青黃繒長丈餘如幡  
畫為雉縣於池下為飾車行則幡動荒蒙也柳車上  
覆即鼈甲也列行也楮屋也偽讀曰帷纁紐纁帛為  
紐也齊臍也柳車上覆形圓如車蓋者曰齊斐形似  
扇木為之在路則障車入棹則障柅圭玉也魚銅魚  
也戴猶值也繫於棺與紐相值故謂之戴披以絳帛  
為之飾棺之制國君畫龍於帷闕其後面而用三池  
池上縣以長幡車行則振動其容飾畫黼文於荒之緣



邊其中央則畫火三列黻三列用素錦以為褚加帷  
於旁以為牆加荒於上以為蓋荒與帷不相聯則用  
纁紐六柳車上覆之齊則用五采五貝交絡其上凡  
黼黻二黻二畫二兩角皆戴以圭於池下振容  
之間懸以銅魚車行則魚躍而上拂於池君以纁帛  
為戴連繫棺束與柳材者六又以纁帛為披令人引  
之以防傾覆者六鄭氏曰飾棺者以革道路及壙中  
不欲衆惡其親也

大夫畫帷二池不振容畫荒火三列黻三列素錦褚纁  
紐二玄紐二齊三采三貝黻翬二畫翬二皆戴綏魚躍  
拂池大夫戴前纁後玄披亦如之士布帷布荒一池揄  
絞纁紐二緇紐二齊三采一貝畫翬二皆戴綏士戴前  
纁後緇二披用纁

此言大夫士飾棺之制也綏讀作蕤三采絳黃黑也  
揄翟也雉類絞青黃繒也大夫畫雲氣於帷柳上止  
二池在旁不用振容又畫雲氣於荒之緣邊其中央

則畫火三列黻三列用素錦以為褚荒與帷不相聯  
則用纁紐二玄紐二柳車上覆之齊則用三采三貝  
交絡其上凡黻翬二畫翬二兩角皆戴采為之綏於  
池下懸以銅魚車行則魚躍而上拂於池大夫之戴  
前纁後玄所以連繫棺束與柳材其以披令人引之  
以防傾覆者色亦如之士以白布為帷為荒不畫柳  
上止一池在前畫掄翟於絞繒在池之上荒與帷不  
相聯則用纁紐二緇紐二柳車上覆之齊則用三采

一貝交絡其上畫翬二兩角皆戴采為之綏士之戴前  
纁後緇所以連繫棺束與柳材其二披令人引之以  
防傾覆者則皆用纁案不振容即雜記上篇大夫不  
揄絞屬於池下也大夫不揄絞而士反揄絞者賤無  
嫌也

君葬用輜四綳二碑御棺用羽葆大夫葬用輜二綳二  
碑御棺用茅士葬用國車二綳無碑比出宮御棺用功  
布

此言君大夫士葬時之等也輶柩車也上輶字讀曰春下輶字作輶無輻之車也綍碑並見檀弓下篇君二碑謂桓楹也御棺羽葆及茅見雜記下篇國車國字亦作輶功布大功之布也國君之葬用輶車以載柩凡四綍二碑御棺之人用羽葆居前以為麾大夫之葬用輶車以載柩凡二綍二碑御棺之人用茅居前以為麾士之葬亦用輶車以載柩有二綍而無碑比出宮御棺之人用大功布居前以為麾於大門墻

內而止至墓不復御也陳氏澂曰案檀弓諸侯輶而設幬則諸侯殯得用輶豈葬不得用輶乎是君葬用輶之輶合讀如字至鄭注大夫以下廢輶故輶當為輶又輶字或作團是以文誤為國則並宜從之

凡封用綍去碑負引君封以衡大夫士以咸君命毋諱以鼓封大夫命毋哭士哭者相止也

此言君大夫士下棺之等也封作窆下棺也引即綍也衡橫木咸讀為緘棺束也凡下棺以綍一頭繫棺

緘以一頭繞碑間轆轤而人在碑外背碑負縛而漸以縱之國君之封禮大物多棺重恐其不正別以大木為衡貫穿棺束之織使平持而下大夫士則以縛繫緘君命戒衆無譁以擊鼓為負引者縱舍之節大夫命人使毋哭士則哭者自相止也案去碑負引疏謂所引之人在碑外背碑而立負引者漸漸應鼓聲而下也

君松槨大夫栢槨士雜木槨棺槨之間君容柩大夫容

壺士容甒君裏椁虞筐大夫不裏椁士不虞筐

此言君大夫士之椁制也。祝樂器壺漏水之器一云。壺甒皆酒器。椁以周於棺之外。而材有不同。國君用松。槨大夫用柏。椁士用雜木。椁而棺。椁之間可以藏物。國君可容祝。大夫可容壺。士可容甒。又國君之椁有物以爲之裏。而又加以虞。筐大夫則不裏。椁士則不虞。筐其尊卑之辨如此。案虞。筐注疏俱未詳。或曰虞之言安其筐。卽苞管以安體魄者。



日講禮記解義卷四十八


謹案卷四十七第二十七頁後二行故得與君同  
用簞也刊本君訛居今改

卷四十八第四頁前二行士與其執事則斂刊本  
士訛上今改

第二十三頁後八行則用三采一貝刊本三訛二  
今改

第二十五頁前五行君命毋譁刊本毋訛無今改





覆校官編修臣方燁

校對官檢討臣郭寅

謄錄監生臣馬嗣全

欽定四庫全書薈要

經部

日講禮記解義卷四十九至五十一

詳校官編修臣程嘉謨




欽定四庫全書薈要卷二千三百四十七

經部

日講禮記解義卷四十九

祭法

  
此篇記祭人鬼天神地示之定制故曰祭法首節及聖王之制以下見國語展禽論祀爰居其郊禘祖宗廟祧壇墠之制並見家語廟制

祭法有虞氏禘黃帝而郊嚳祖顓頊而宗堯夏后氏亦禘黃帝而郊鯀祖顓頊而宗禹殷人禘嚳而郊冥祖契

而宗湯周人禘嚳而郊稷祖文王而宗武王

此言四代禘郊祖宗之制也嚳黃帝之曾孫顓頊黃  
帝之孫堯稷契皆帝嚳之子鯀禹之父禮莫重於祭  
而祭有法焉昔先王盡其誠孝報本追遠既已祖有  
功宗有德立為世室而百世不遷矣又於孟夏而行  
禘禮則推始祖所自出之帝祀之於始祖之廟而以  
始祖配之於冬至而行郊禮則祀天於郊而以始祖  
配之在有虞氏則禘黃帝而郊嚳祖顓頊而宗堯夏

后氏亦禘黃帝而郊鯀祖顓頊而宗禹殷人則禘嚳而郊冥祖契而宗湯周人亦禘嚳而郊稷祖文王而宗武王楊氏復曰禘與祖宗皆宗廟之祭也祭法禘在郊上者謂郊以祖配天禘上及其祖之所自出禘遠而祖近故也鄭氏分圜丘與郊為二以禘為冬至祀昊天於圜丘而以嚳配之以郊為祭感生帝於南郊而以稷配之既謂禘郊皆為配天矣遂併以祖宗為祀五帝於明堂而以祖宗配之皆非也



燔柴於泰壇祭天也瘞埋於泰折祭地也用騂犢

此言祭天地之禮也燔燎也泰者尊之之辭泰壇即圜丘泰折即方澤折如折旋之義喻方也騂赤色積柴而加牲玉其上燔於泰壇者祭天之禮也以牲幣而瘞埋於泰折者祭地之禮也所用之牲厥惟騂犢蓋天秉陽而神在上地秉陰而神在下故燔柴則升而明瘞埋則藏而幽所以達其氣與誠也地陰祀用黝牲與天俱用犢連言爾

埋少牢於泰昭祭時也相近於坎壇祭寒暑也王宮祭日也夜明祭月也幽宗祭星也雩宗祭水旱也四坎壇祭四方也山林川谷丘陵能出雲為風雨見怪物皆曰神有天下者祭百神諸侯在其地則祭之亡其地則不祭

此廣言祭上下四方諸神之禮也泰昭壇名時四時也相近王肅本作祖迎深者為坎高者為壇王宮謂日壇營域如王者之宮也夜明謂月壇月明於夜也

幽宗謂星壇幽光小而闇也宗之為言尊也雩宗謂水旱壇雩吁嗟求雨聲也四坎壇四方之坎壇也自祭天地而外如四時錯行以生萬物而必埋少牢於泰昭者所以祭四時也寒暑往來以成歲功而必或送或迎於坎與壇者所以祭寒暑也日者陽德而有君象故春朝之於王宮所以祭日也月者陰德而以夜出故秋宵之於夜明所以祭月也月為明而星則幽故有壇曰幽宗者所以祭星也水旱不時則禱故

有壇曰雩宗者所以祭水旱也。在天則為四時，在地則為四方，故四坎壇者所以祭四方之神也。他如山林、川谷、丘陵，能興雲氣為風雨，見怪物者，亦皆曰神。唯天子為百神之主，故有天下者祭百神。若諸侯必神在其地，乃祭之，使亡其地，則有不得復祭者。案相近鄭注，當為禳祈聲之誤也。寒暑不時，或禳之，或祈之王，肅作祖迎，蓋本於周禮篇章，逆暑迎寒之意。張子則曰：日月星辰、風雨寒暑，無時祭，皆從祀於郊。言

王宮夜明幽崇之類皆指其祭位爾寒暑無定暑近日壇寒近月坎故曰相近於坎壇也此先儒疑義當並存之

大凡生於天地之間者皆曰命其萬物死皆曰折人死曰鬼此五代之所不變也七代之所更立者禘郊祖宗其餘不變也

此言禮有因革之不同也物謂之折言其有所毀人謂之鬼言其有所歸也大凡人物生於天地之間雖

數有長短分有大小而莫不有制焉者是皆曰命其萬物之死皆曰折人之死則曰鬼此所命之名固唐虞夏商周歷五代而有所不能變也若夫統計顓頊帝嚳以來七代之所更立者唯禘郊祖宗之祭各主其所自生其餘若天地日月山川之類則仍不變也方氏慤曰不變自堯而下者由堯以前其法未成其名或變也更立不及黃帝者七代同出自黃帝黃帝無統於上七代則更於下也

天下有王分地建國置都立邑設廟祧壇墠而祭之乃為親疏多少之數

此總言分封建廟之制也建國封諸侯也置都立邑為卿大夫之采地及賜士有功者之地祧超也謂超而上也封土曰壇除地曰墠天下有王則法制所由定也於是乎分地建國置都立邑加恩於其下而更推孝於其先爰設為廟及毀廟之祧去祧之壇去壇之墠以祭之然人心無窮分則有限乃又為之昭穆

祖考以定其親疏之數為之七五三二以定其多少之數蓋先王立制之大槩如此

是故王立七廟一壇一墀曰考廟曰王考廟曰皇考廟曰顯考廟曰祖考廟皆月祭之遠廟為祧有二祧享嘗乃止去祧為壇去壇為墀壇墀有禱焉祭之無禱乃止去墀曰鬼

此言天子之廟制也七廟謂高曾祖禰與始祖為五并二祧凡七也王考即祖皇考即曾祖顯考即高祖



祖考謂始祖也享嘗四時之祭也惟祭有親疏多少之數是故王者既立七廟又設一壇一墀曰考廟曰王考廟曰皇考廟曰顯考廟曰祖考廟夫始祖百世不遷高曾祖禰四親廟乃恩所當厚是皆每月而祭之至遠廟為祧以奉昭穆遞遷之主者有二祧廟則但享嘗祭之而止世遠則去祧而為壇去壇而為墀此惟有禱焉斯祭之無禱乃止其視壇墀又遠者雖禱不及但名之曰鬼而已案注疏以文武不遷之廟

為二祧足七廟之數實止於五廟將與諸侯何異蓋  
文武二世室當在七廟之外此朱子所以取劉歆之  
說也張子曰廟祧壇墠之法與經多不合恐別是一  
法非世之達禮

諸侯立五廟一壇一墠曰考廟曰王考廟曰皇考廟皆  
月祭之顯考廟祖考廟享嘗乃止去祖為壇去壇為墠  
壇墠有禱焉祭之無禱乃止去墠為鬼

此言諸侯之廟制也諸侯降於天子立五廟又立一

壇一壇曰考廟曰王考廟曰皇考廟親近而恩隆皆  
每月祭之顯考廟祖考廟則但享嘗祭之而止高祖  
以上去廟而為壇去壇而為墀此惟有禱焉斯祭之  
無禱乃止其又遠者雖禱不及則去墀而為鬼已案  
諸侯廟止於五有功德而數不加無功德而數不減  
大夫立三廟二壇曰考廟曰王考廟曰皇考廟享嘗乃  
止顯考祖考無廟有禱焉為壇祭之去壇為鬼

此言大夫之廟制也大夫降於諸侯立三廟又設二

壇曰考廟曰王考廟曰皇考廟俱於享嘗祭之而止  
顯考祖考則無廟有禱焉斯為壇祭之其當遷者雖  
禱不及則去壇而為鬼已案始為大夫者如諸侯始  
封之君此云祖考無廟非也

適士二廟一壇曰考廟曰王考廟享嘗乃止皇考無廟  
有禱焉為壇祭之去壇為鬼官師一廟曰考廟王考無  
廟而祭之去王考為鬼庶士庶人無廟死曰鬼

此言士庶人之廟制也適士謂天子上中下之士及

諸侯之上士官師諸侯之中士下士為一官之長者  
庶人謂府史之屬士又降於大夫惟適士立二廟設  
一壇曰考廟曰王考廟俱於享嘗祭之而止皇考則  
無廟有禱焉斯為壇祭之其當遷者雖禱不及則去  
壇而為鬼官師之士祇立一廟曰考廟王考雖無廟  
而得於此祭之其更上者則去王考而為鬼庶士庶  
人皆降而無廟死則曰鬼而已案庶士庶人死皆曰  
鬼而所以事者必有道焉則王制云庶人薦於寢家

語云四時祭於寢是也

王為羣姓立社曰大社王自為立社曰王社諸侯為百姓立社曰國社諸侯自為立社曰侯社大夫以下成羣立社曰置社

此言立社之義也社土神大社在庫門內之右王社在籍田國社在公宮之右侯社亦在籍田大夫以下包士庶而言成羣立社即今里社也天子主天下之土穀欲奠億萬人之居足億萬人之食而為羣姓立

社曰大社王自為立社以供粢盛曰王社諸侯主域中之土穀欲奠一國之民居足一國之民食而為百姓立社曰國社侯自立社以供粢盛曰侯社大夫以下因成聚而居共立一社曰置社方氏慤曰王有天下故稱羣姓諸侯有一國故稱百姓亦天子曰兆民諸侯曰萬民之意

王為羣姓立七祀曰司命曰中雷曰國門曰國行曰泰厲曰戶曰竈王自為立七祀諸侯為國立五祀曰司命

曰中霤曰國門曰國行曰公厲諸侯自為立五祀大夫立三祀曰族厲曰門曰行適士立二祀曰門曰行庶士庶人立一祀或立戶或立竈

此言立祀之不同也司命主督察人命者中霤門行戶竈見月令國門謂城門國行在國門外之西泰厲古帝王之無後者公厲古諸侯之無後者族厲古大夫之無後者春秋傳云鬼有所歸乃不為厲故祀之也神之散處人間者祀必各因其等王為羣姓凡立



七祀曰司命曰中雷曰國門曰國行曰泰厲曰戶曰  
竈皆所以為民此外王又自為立七祀諸侯為其國  
凡立五祀曰司命曰中雷曰國門曰國行曰公厲亦  
所以為民此外諸侯又自為立五祀大夫凡立三祀  
曰族厲曰門曰行適士凡立二祀曰門曰行庶士庶  
人止立一祀或立戶或立竈案五祀為王侯以下之  
達禮見於經傳者非一今增減其數別無可據注家  
於儀禮士禱於五祀則以為博求以自盡於曲禮大

夫祭五祀又以為有地之大夫蓋皆本此而為之詞  
不若闕疑之為愈也

王下祭殤五適子適孫適曾孫適玄孫適來孫諸侯下  
祭三大夫下祭二士及庶人祭子而止

此言以尊祭卑之義也玄孫之子稱來者以其世數  
雖遠方來而未已也尊有祭卑之禮王之下祭殤凡  
五為適子適孫適曾孫適玄孫適來孫諸侯之下祭  
凡三大夫之下祭凡二適士及庶人則祭子而止應

氏鏞曰祭殤之數唯王者德厚流光祭及於五所愛者遠也祭止於適所重者正統也

夫聖王之制祭祀也法施於民則祀之以死勤事則祀之以勞定國則祀之能禦大菑則祀之能捍大患則祀之

此總言制祭祀之義也夫聖王之制祭祀所以報功也民功曰庸故法施於民則祀之事功曰勞故以死勤事則祀之以勞定國則祀之治功曰力故能禦天

之大蓄則祀之能捍人之大患則祀之凡皆以為民而已

是故厲山氏之有天下也其子曰農能殖百穀夏之哀也周弃繼之故祀以為稷共工氏之霸九州也其子曰后土能平九州故祀以為社

此言農弃后土之法施於民也厲亦作烈炎帝神農也周弃為后稷官因號為后稷共工氏在炎帝之前太昊之後后君也為君而掌土故謂之后土上古稼

穡之不知是故厲山氏之有天下也脩耒耜之利其  
子名柱能殖百穀作農官因命之曰農及夏之哀也  
有周弃繼之故以穀神祀之而為稷上古水土之不  
平自共工氏之霸九州也其子名勾龍為后土官因  
號曰后土實能平治九州故以土神祀之而為社案  
弃在夏末以樹藝稱聖自殷以來遂代烈山氏而祀  
之配穀神也共工氏乃春秋傳所謂以水紀官者勾  
龍功在水土故祀之以配土神也

帝嚳能序星辰以著衆堯能賞均刑法以義終

此言帝嚳與堯之法施於民也上古之民不知天象  
帝嚳能序星辰之次舍得推步之法以著於天下於  
是乎衆因占驗而知休作之期堯當在位既能賞得  
其均刑中其法後復官天下而不私禪位於舜而以  
義終焉孔氏疏曰封禹稷官得其人是能賞均平也  
五刑有法是能刑有法也陳注以能賞二字為句者  
非

舜勤衆事而野死鯀鄣鴻水而殛死禹能脩鯀之功

此言舜之以死勤事禹之以勞定國也鄣壅塞也舜當在位勤於衆事甚至而其後竟以巡守而崩於蒼梧之野鯀治鴻水不知因勢利導而壅塞焉以至殛死於羽山禹能改正其事是以卒成治水之功而貽明德之遠也案禹以勞定國而又實禦大菑固宜萬世祀之至鯀治水九載亦有功得祀蓋列於以死勤事者與

黃帝正名百物以明民共財顓頊能脩之

此言黃帝顓頊之法施於民也黃帝以前物未有名  
因為正名百物以明示於民而使取以備財用顓頊  
能繼而脩明之故其利之所及者大也劉氏彙曰黃  
帝垂衣裳而定尊卑之法舟楫取諸渙服牛乘馬取  
諸隨重門擊柝取諸豫杵臼取諸小過弧矢取諸睽  
宮室取諸大壯棺槨取諸大過書契取諸夬皆其正  
百物之名以興天下之利而共其財用於無窮者也



契為司徒而民成冥勤其官而水死

此言契之法施於民冥之以死勤事也司徒教官之  
長契為司徒敬敷五教使父子君臣夫婦兄弟朋友  
之倫各得其分所由化民而成俗也契之六世孫有  
名冥者勤於其官甚至而其後竟以水死案月令三  
冬之月其神玄冥冥即玄冥以其為水官故曰玄冥  
湯以寬治民而除其虐文王以文治武王以武功去民  
之蓄此皆有功烈於民者也

此言湯與文武之禦蓄捍患也烈業也湯既伐夏因  
桀之殘民以逞也於是乎治民以寬為之悉除其虐  
文王治於岐山發政施仁化行俗美是為文治武王  
伐紂秉旄杖鉞除暴救民是為武功文武之治功不  
同而皆所以去民之蓄凡此自厲山氏以下皆其有  
功烈於民者也陸氏佃曰於此言稷讐堯鯀禹顓頊  
契冥湯文武以見四代郊禘祖宗非專為私恩也徐  
氏師曾曰黃帝堯舜禹湯文武之當祀乃以繼天立

極道統淵源之故不但如上數者功烈之迹而已記者特舉以見例耳

及夫日月星辰民所瞻仰也山林川谷丘陵民所取財用也非此族也不在祀典

此推言祀典以總結上文也族類也祀典祭祀之典籍也更兼乎上下而言之則及乎日月星辰照臨下土而為民之所瞻仰也山林川谷丘陵長養萬物而為民之所取以資財用也有天下者祀以為報要無

非所以重民之生而已如其無功烈與無益於民而  
非此族也則有不得在乎祀典者案此就上泰壇泰  
折等祀而約言天神地祇之屬

日講禮記解義卷四十九

欽定四庫全書薈要卷二千三百四十八

經部

日講禮記解義卷五十

祭義

義者言所以祭之義理也篇中即祭以明孝弟敬讓之義至為詳切蓋人事之本末人道之始終備於是矣

祭不欲數數則煩煩則不敬祭不欲疏疏則怠怠則忘是故君子合諸天道春禘秋嘗霜露既降君子履之必

有悽愴之心非其寒之謂也春雨露既濡君子履之必有怵惕之心如將見之樂以迎來哀以送往故禘有樂而嘗無樂

此言孝子感時設祭之義也禘陳注作禴伏氏趙氏讀如字悽愴悲傷貌怵惕驚動貌祭必有時不欲先時而數數則其事煩煩則涉於不敬亦不欲後時而疏疏則其事怠怠則近於遺忘是故君子之祭也合於天時之序而春禘秋嘗霜露既降萬物感陰而哀

而君子履之必有悽愴之心者悲亡者之愈遠而非其寒之謂也春則雨露既濡萬物感陽以生而君子履之必有怵惕之心者如往者之復還而將目見之也惟歡樂以迎其來悲哀以送其往故禘有樂而嘗無樂者以此案鄭注春禘夏殷禮也周以禘為殷祭孔疏周禮四時祭皆有樂殷烝嘗之祭亦有樂故那詩云庸鼓有繹萬舞有奕吳氏澄曰儀禮少牢特牲大夫士四時皆不用樂此蓋天子諸侯之祭然亦不



知所據

致齊於內散齊於外齊之日思其居處思其笑語思其志意思其所樂思其所嗜齊三日乃見其所為齊者

此言將祭之義也致齊如祭統心不苟慮之類於內就齊所也散齊如不飲酒不茹葷不弔喪不聽樂之類於外未就齊所也五其字皆指親而言祭必先致齊三日於內散齊七日於外當齊之日則思其居處之所安思其笑語之所形思其志意之所向思其所

樂之事思其所愛之物齊至三日乃恍然而見其所  
為齊者程子曰思其居處思其笑語此孝子平日思  
親之心非齊也齊不容有思齊者湛然純一方能與  
鬼神接案鄭注見所為齊者思之熟也孔子亦言祭  
思敬程子說不如注義之平實

祭之日入室儼然必有見乎其位周還出戶肅然必有  
聞乎其容聲出戶而聽愾然必有聞乎其歎息之聲

此言正祭之義也儼然彷彿貌肅然敬惕貌愾然感

慨貌當祭之日始入廟室則儼然而必有見於神位  
及薦饌而周還出戶則肅然而必有聞乎其舉動容  
止之聲既出戶而傾耳以聽則愾然而必有聞乎其  
歎息之聲蓋孝子聚一己之精神而因以聚祖考之  
精神本有通一而不二者其必有見必有聞是誠之  
不可揜也

是故先王之孝也色不忘乎目聲不絕乎耳心志嗜欲  
不忘乎心致愛則存致懋則著著存不忘乎心夫安得

不敬乎君子生則敬養死則敬享思終身弗辱也

此覆言孝子念親之誠以結上意也愬專謹也是故先王之孝其親也親之色不忘乎日常若承順之時親之聲不絕乎耳常若聽命之時親之心志嗜欲不忘乎心常若先意承志之時此豈可以勉為哉惟心於親而極其愛則亡者以存極其慤則微者以著著存既不忘乎心則念念在茲夫安得而不敬乎君子之於親生則敬其養死則敬其享者凡以思終身而

弗至或貽以辱也案君子之孝本於思思在親身者極追慕之誠思在己身者盡全歸之理而皆不外於一敬也

君子有終身之喪忌日之謂也忌日不用非不祥也言夫日志有所至而不敢盡其私也

此申言君子終身念親不忘之事也忌日親亡之日也夫日猶此日也君子之於親喪不過三年而又有終身之喪者則忌日之謂也忌日不為他事非以為

不祥而避之言此日感念其親哀痛慘怛之情於是為至而不敢盡心於己之私事也案子於忌日當以喪禮處之故為終身之喪

唯聖人為能饗帝孝子為能饗親饗者鄉也鄉之然後能饗焉是故孝子臨尸而不作君牽牲夫人奠盞君獻尸夫人薦豆卿大夫相君命婦相夫人齊齊乎其敬也愉愉乎其忠也勿勿諸其欲其饗之也

此言孝子祭祀冀親歆饗之義也盞盞齊也勿勿猶

切切也諸語辭猶然也天子祭帝人子祭親禮之常也唯聖人為能郊焉而饗帝孝子為能廟焉而饗親其所以饗者以其心鄉乎帝與親也必心鄉之然後能致其來饗焉是故孝子臨尸而不怍誠有無間於幽明者其為主祭則君牽牲而夫人奠盞君獻尸而夫人薦豆其為助祭則有卿大夫以相君命婦以相夫人齊齊乎外有整肅之儀也愉愉乎內有和順之實也勿勿然內外兼盡欲其饗此薦獻之饌也孔氏

疏曰此本為饗親而發欲與饗帝同也項氏安世曰  
仁人之心與天地為一體孝子之心與父母為一人  
文王之祭也事死者如事生思死者如不欲生忌日必  
哀稱諱如見親祀之忠也如見親之所愛如欲色然其  
文王與詩云明發不寐有懷二人文王之詩也祭之明  
日明發不寐饗而致之又從而思之祭之日樂與哀半  
饗之必樂已至必哀

此言文王之能饗親也稱諱者宗廟之禮上不諱下



祭高祖則不諱曾祖以下也詩小雅小宛之篇明發  
謂將旦光明開發也二人父母也昔文王之祭也事  
死者一如事生思死者直如不欲獨生遇忌日則必  
哀聞稱諱則如見其親祀之而務盡其心也如見親  
之所愛真有欲之之色然其唯文王能之與詩云明  
發不寐有懷二人此文王之謂也文王不特忠於方  
祭而已於祭之明日而繹更有明發不寐者於親既  
饗而致之又從而思之明日且然矧於正祭故祭之

日樂與哀各參其半饗之必樂為喜其來已至必哀  
為悲其往也案如欲色然家語作思之深如見親之  
所愛祭欲見親顏色者其惟文王乎

仲尼嘗奉薦而進其親也慤其行也趨趨以數已祭子  
贛問曰子之言祭濟濟漆漆然今子之祭無濟濟漆漆  
何也子曰濟濟者容也遠也漆漆者容也自反也容以  
遠若容以自反也夫何神明之及交夫何濟濟漆漆之  
有乎反饋樂成薦其薦俎序其禮樂備其百官君子致

其濟濟漆漆夫何慌惚之有乎夫言豈一端而已夫各有所當也

此言孔子之能饗親也嘗秋祭也趨趨行步迫狹也濟濟衆盛貌漆漆光澤貌若及也仲尼於嘗之祭奉所薦而進於尸其親執事也容極專慤其行步也促促而頻數祭畢而子貢問曰昔者子之言祭宜濟濟漆漆然今觀子之祭而無濟濟漆漆者何也子曰濟濟者容也是處已於疏遠也漆漆者容也是自反以

脩整也容之疏遠及自反以脩整皆文過其質者也  
夫何神明之及交我之自祭夫何濟濟漆漆之有乎  
昔所言者蓋謂天子諸侯之祭尸初在室後出在堂  
更反入於室而設饋作樂既成主人薦其薦籩薦豆  
與牲體之俎序禮樂備百官獻酬往復凡助祭之君  
子各以威儀相尚而致其濟濟漆漆夫何思念慌惚  
之有乎夫人之立言因人因事豈止一端而已夫固  
各有所主也濟濟漆漆乃賓客之容非主人之容其

不可執一而論也明矣

孝子將祭慮事不可以不豫此時具物不可以不備虛中以治之

此言孝子誠以享親也比時當行禮時也具物陳設器饌之屬孝子於將祭時必有當為之事則慮之不可以不豫及方祭時必有陳設之物則具之不可以不備而又必湛然純一虛其中以治之蓋惟心無事而後可以慮事心無物而後可以備物也夫虛中者

敬之至也程子所謂有主則虛是也主於敬而事與物乃非虛器矣

宮室既脩牆屋既設百物既備夫婦齊戒沐浴盛服奉承而進之洞洞乎屬屬乎如弗勝如將失之其孝敬之心至也與薦其薦俎序其禮樂備其百官奉承而進之於是諭其志意以其恍惚以與神明交庶或饗之庶或饗之孝子之志也

此承上而言孝子祭盡其誠也兩奉承而進之上言

主祭者下言助祭者諭告也孝子虛中以治而事豫  
物備則宮室之既脩牆屋之既設百物之既備而祭  
可行矣於是夫婦齊戒沐浴盛服奉承祭物而進之  
洞洞乎屬屬乎如有重而弗能勝如將失之者其孝  
敬之心至也與然助祭者或有不恭則吾之孝敬猶  
爲未至又必於薦其薦俎序其禮樂備其百官之時  
皆奉承祭物而進之於是祝以孝告達其志意冀以  
其愼焉愼焉者以與神明交而庶或饗之庶或饗之

此孝子之志也輔氏廣曰洞洞言其內之直而無蔽也屬屬言其誠之弗息也

孝子之祭也盡其慤而慤焉盡其信而信焉盡其敬而敬焉盡其禮而不過失焉進退必敬如親聽命則或使之也

此極言孝子享親之誠也孝子之祭也內志盡故盡其慤而慤焉盡其信而信焉外物亦盡故盡其敬而敬焉盡其禮而舉無過失焉進退必主於敬如親聆



父母之命而或有所使然者此所謂如在之誠也葉氏夢得曰慤者信之始信者慤之著敬者禮之實禮者敬之文

孝子之祭可知也其立之也敬以詘其進之也敬以愉其薦之也敬以欲退而立如將受命已徹而退敬齊之色不絕於面孝子之祭也立而不詘固也進而不愉疏也薦而不欲不愛也退立而不如受命教也已徹而退無敬齊之色而忘本也如是而祭失之矣

此言孝子之祭觀其貌而知其心也固猶質陋也孝子之祭有可望而知者其待事而立也則敬以形其罄折之容其從事而進也則敬以逞其怡悅之色其奉物而薦也則敬以致其欲享之意少退而立如將受命於其前已徹而退敬齊之色猶不絕於其面自始至終如此此孝子之祭也若夫立而不誣是其固也進而不愉是其疏也薦而不欲是不愛也退立而不如受命是其傲也已徹而退無敬齊之色是念不

存親而忘本也如是而祭迹是而情非其失之也多矣

孝子之有深愛者必有和氣有和氣者必有愉色有愉色者必有婉容孝子如執玉如奉盈洞洞屬屬然如弗勝如將失之嚴威儼恪非所以事親也成人之道也

此因祭而推言孝敬之義也孝子之有深愛者必有和暉之氣有和氣者必有愉悅之色有愉色者必有婉順之容孝子如執玉之恭如奉盈之慎洞洞屬屬

然如弗能勝如將失之斯愛與敬交至者也若夫嚴威儼恪則敬過於愛而非所以事親也乃成人盡飾之道也鄭注云成人既冠者然則孝子不失其孺子之心也吳氏澄曰以上皆言祭之義此節總言孝子事親之愛敬生事死祭一皆如此也

先王之所以治天下者五貴有德貴貴貴老敬長慈幼此五者先王之所以定天下也貴有德何為也為其近於道也貴貴為其近於君也貴老為其近於親也敬長

為其近於兄也慈幼為其近於子也是故至孝近乎王  
至弟近乎霸至孝近乎王雖天子必有父至弟近乎霸  
雖諸侯必有兄先王之教因而弗改所以領天下國家  
也

此因論孝而推言之而又特明孝弟之重也先王之  
所以治天下者其教有五曰貴有德貴貴貴老敬長  
慈幼此五者乃先王之所以定天下也夫道之理一  
而德之分殊所以貴有德者何為德之近於道也臨

我者有君所以貴貴為貴之近於君也生我者有親  
所以貴老為老之近於親也先我者有兄所以敬長  
為長之近於兄也承我者有子所以慈幼為幼之近  
於子也是故至孝之仁近乎王至弟之義近乎霸惟  
至孝近乎王故雖天子必以孝事其父惟至弟近乎  
霸故雖諸侯必以弟事其兄先王之教因人心之固  
有而無所改移所以統領乎天下國家而俾之率循  
乎孝弟也案敬長義也霸者以義尊王者也人人親

其親長其長而天下平是故堯舜之道孝弟而已矣  
子曰立愛自親始教民睦也立敬自長始教民順也教  
以慈睦而民貴有親教以敬長而民貴用命孝以事親  
順以聽命錯諸天下無所不行

此承上而言孝弟之為本教也睦和厚也錯與措通  
孔子曰人君雖無所不愛而愛莫切於事親故立愛  
自親始所以教民睦也人君雖無所不敬而敬莫先  
於從兄故立敬自長始所以教民順也教以慈睦則

民興孝而貴有其親教以敬長則民興弟而貴用其  
命誠能孝以事親順以聽命由是錯諸天下而無所  
不行固其宜矣馬氏曰此與伊訓所謂立愛惟親立  
敬惟長始于家邦終于四海孝經所謂愛敬盡於事  
親德教加於百姓刑於四海皆天子之事也

郊之祭也喪者不敢哭凶服者不敢入國門敬之至也  
祭之日君牽牲穆容君卿大夫序從既入廟門麗于碑  
卿大夫袒而毛牛尚耳鸞刀以割取腍臂乃退燭祭祭



腥而退敬之至也

此言郊與廟祭之致其敬也穆謂子也君為昭則穆答君君穆則昭答可知麗猶繫也郊之祭也為吉禮大事故有喪者不敢以哭凶服者不敢以入國門此人君所為敬之至也廟祭之日君迎牲而親牽以入穆對君共牽卿大夫以次而佐幣以從既入廟門以牲紉麗於中庭之碑孔將殺則卿大夫袒而取毛於牛以告全尚耳以主聽用鸞刀剗取胙臂以升臭人

君乃於是而暫退至於湯燭有祭與祭其腥則朝踐之禮終而退矣此人君所為敬之至也

郊之祭大報天而主日配以月夏后氏祭其閭殷人祭其陽周人祭日以朝及闇

此言郊祭之禮與時也萬物本乎天郊之祭所以大報天生物之功也天以日月為用故主日而配以月此三代所同也祭天之時則夏后氏尚黑於日入而祭其閭殷人尚白於日中而祭其陽周人尚赤祭日

於昧爽之初以朝及闇其不同者如此案此言及闇與禮器逮闇同義劉氏謂先日欲出之初是也

祭日於壇祭月於坎以別幽明以制上下祭日於東祭月於西以別外內以端其位日出於東月生於西陰陽長短終始相巡以致天下之和

此詳言祭日月之義也位謂陰陽之位先王祭日於王宮之壇祭月於夜明之坎何也壇顯坎隱以別幽明壇高坎深以制上下也祭日之壇必於東方祭月

之坎必於西方何也出東入西以別外內東陽西陰  
以端其位凡以日出於東月生於西故也夫陽饒而  
陰乏一長一短終始相巡而未嘗絕故足以致天下  
之和而生成萬物此日月所以當祭也孔氏疏曰日  
月有合祭之時郊祭天主以日配以月是也有分祭  
之時春分朝日秋分夕月是也

天下之禮致反始也致鬼神也致和用也致義也致讓  
也致反始以厚其本也致鬼神以尊上也致物用以立

民紀也致義則上下不悖逆矣致讓以去爭也合此五者以治天下之禮也雖有奇邪而不治者則微矣

此因祭義而推言禮教之所及也微猶少也天下之禮有郊廟以致反始也有羣祀以致鬼神也有備物以致和用也辨名分以致義也崇樽節以致讓也致反始所以知本而厚為報也致鬼神所以嚴敬而尊上也致物用所以明等列而立人紀也致義則上下胥安而無悖逆矣致讓所以去爭也人君苟能合此

五者以治天下之禮也將見禮達而教成雖有奇邪  
不從治之人則已少矣案鄭注因祭之義汎說禮也  
劉氏彛專以郊言謂天者人之始是致反始也尊祖  
配天是致鬼神也郊焉而天神格所以致陰陽之和  
而民人康致萬物之豐而邦用足也父母乎天地兄  
姊乎日月所以致人倫之義也聖人澤被天下必嚴  
郊祀而讓德於天所以致讓也承上文而申言饗帝  
之義於經義尤融貫

宰我曰吾聞鬼神之名不知其所謂子曰氣也者神之盛也魄也者鬼之盛也合鬼與神教之至也

此言鬼神之名以及其教也宰我問曰吾聞鬼神之名而不知其所謂請夫子一明示之子曰鬼神不外於吾身氣也者屬乎陽而主動是神之盛也魄也者屬乎陰而主靜是鬼之盛也即吾身之氣與魄而可以知鬼神之情狀是故先王合鬼與神而制為祭祀之禮郊廟之典隆而仁孝之德盡所以為教之至也

案此言氣與魄與大傳言精氣為物游魂為變同義造化之鬼神不可知即以吾身之鬼神而知之

衆生必死死必歸土此之謂鬼骨肉斃于下陰為野土其氣發揚于上為昭明焄蒿悽愴此百物之精也神之著也因物之精制為之極明命鬼神以為黔首則百衆以畏萬民以服

此言鬼神之所由名也陰言依陰於地中而為土壤也焄謂香臭也蒿謂氣蒸出貌也凡衆之生必有死



死必歸於土以其歸也故謂之鬼骨肉既斃於下陰而為野土其氣無所附麗則發散飛揚於上或為朗然而昭明或袞然而焄蒿或肅然而悽愴此百物之精爽所為而即神之顯著也聖人因其精靈之不可掩者制為尊極之稱而顯命之曰鬼神以為民之法則故百衆以此知畏萬民以此知服也

聖人以為是為未足也築為宮室設為宗祧以別親疏遠邇教民反古復始不忘其所由生也衆之服自此故聽

且速也

此言聖人為鬼神立宗廟之事也。聖人以尊名鬼神為未足，以致其實也。於是乎築為宮室，設為宗祧，以別其親疏遠邇，而多少隆殺之數，因之。所以教民反之於昔，而復其始，不忘此身之所由生也。惟制禮緣於人情，宜乎衆民之服從自此，故莫不由之而聽且速也。案始謂受氣之始，由生謂形之所由生。孔氏疏以先祖為古父母為始者，似非。

二端既立報以二禮建設朝事燔燎羶薌見以蕭光以報氣也此教衆反始也薦黍稷羞肝肺首心見閒以俠觶加以鬱鬯以報魄也教民相愛上下用情禮之至也此詳言宗廟之祭也祭以質明行事故曰朝事羶脾膋也薌黍稷也見現同猶著也羞進也殷肝周肺虞首夏心四代之祭也見閒合讀為覲雜也俠夾也觶瓦尊也鬼神之二端既立於是報以朝踐饋食之二禮以朝踐言之則建設質明所行之事焚脾膋黍稷

於爐炭而合之以蕭使其光上見蓋以魂氣歸於天  
故尚臭以求諸陽而以報氣也此正以教民反始也  
以饋食言之則薦以黍稷進以肝肺首心雜以兩鬴  
醴酒又加以初祭之鬱鬯蓋以形魄歸於地故尚味  
以求諸陰而以報魄也此以人道祭之而教民相愛  
故告慈告孝而上下皆用其情所以為禮之極至也  
案報氣以氣報魄以實此陰陽之義鬱鬯當在先而  
列於後者依類言之

君子復古復始不忘其所由生也是以致其敬發其情竭力從事以報其親不敢弗盡也

此申言復古復始以起下文也君子惟復古復始不忘其身所由生也是以內而致其敬發其情又竭力從事於外以上報其親不敢有所弗盡也案報其親即報氣報魄之謂

是故昔者天子為藉千畝冕而朱紘躬秉耒諸侯為藉百畝冕而青紘躬秉耒以事天地山川社稷先古以為

醴酪齊盛於是乎取之敬之至也

此言耕藉之禮也紘繫冕為固者先古先祖也惟報親必竭其力是故昔者天子為藉田千畝必冕而朱紘躬自秉耒而為三推之耕諸侯為藉田百畝必冕而青紘躬自秉耒而為九推之耕蓋將以事天地山川社稷先古凡為醴酪齊盛皆於是乎取之此敬之至也陳氏祥道曰南郊正陽之位朱紘正陽之色也東郊少陽之位青紘少陽之色也方氏慤曰天地指

天子言之山川社稷先古則兼諸侯言之

古者天子諸侯必有養獸之官及歲時齊戒沐浴而躬朝之犧牲祭牲必於是取之敬之至也君召牛納而視之擇其毛而卜之吉然後養之君皮弁素積朔月月半君巡牲所以致力孝之至也

此言養牲之禮也養獸之官如周禮牧人牛人充人之類躬親也言朝者敬辭也牛羊豕曰牲朔月月朔也古者天子諸侯平時必有養獸之官及歲時將祭

必齋戒沐浴而躬朝之凡色純之犧體完之牲可中  
祭牲者皆於是乎取之此敬之至也由是君召牛納  
而視之擇其毛之相宜者而卜之吉然後繫於牢而  
養之君服皮弁之服素積之裳於朔月月半而巡視  
其牲此所以致力而為孝之至也孔氏疏曰耕藉云  
敬之至養牲云孝之至互文也

古者天子諸侯必有公桑蠶室近川而為之築宮仞有  
三尺棘牆而外閉之及大昕之朝君皮弁素積卜三宮



之夫人世婦之吉者使入蠶室奉種浴于川桑于公桑風戾以食之歲既單矣世婦卒蠶奉繭以示于君遂獻繭于夫人夫人曰此所以為君服與遂副禕而受之因少牢以禮之古之獻繭者其率用此與及良日夫人繅三盆手遂布于三宮夫人世婦之吉者使繅遂朱綠之玄黃之以為黼黻文章服既成君服以祀先王先公敬之至也

此言親蠶之禮也七尺曰仞仞有三尺高一丈也外

閉戶扇在外而閉向內也大昕之朝季春之朔旦也  
三宮在天子則為三夫人在諸侯之夫人則立三宮  
半后之六宮也戾至也風至則桑乾可以食蠶也單  
盡也去歲蠶成迄今暮歲故云歲單也副之言覆首  
飾所以覆首也褱褱衣也禮之禮獻繭者也三盆手  
者置繭盆中以手三次淹之而振出其緒也古者天  
子諸侯必有公家之桑養蠶之室近川而為之築宮  
以便於浴種高仞有三尺置棘於牆上而外閉之及

季春月朔君服皮弁素積卜三宫之夫人世婦之吉者使之入蠶於蠶室奉種以浴於川采桑於公桑俟風至葉乾乃取以食之及三月之盡則自去歲蠶成以至於今歲既畢矣於是世婦卒蠶奉繭以示於君而告其成功遂獻繭於夫人夫人曰此所以為君之祭服與遂副禕而受之因用少牢以禮之凡古之獻繭者其皆用此與及吉日夫人纁繭為絲則三次於盆以手振出其緒遂分布於三宫夫人及世婦之吉

者使纁以終事遂從而朱綠之玄黃之備為黼黻文  
章服既成君乃服以祀先王先公此敬之至也案孔  
子告宰我之言止此

日講禮記解義卷五十

欽定四庫全書薈要卷二千三百四十九

經部

日講禮記解義卷五十一

祭義

君子曰禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則天天則神天則不言而信神則不怒而威致樂以治心者也致禮以治躬則莊敬莊敬則嚴威心中斯須不和不樂而鄙詐之心入之矣外貌斯須不莊不敬而

慢易之心入之矣故樂也者動於內者也禮也者動於外者也樂極和禮極順內和而外順則民瞻其顏色而不與爭也望其容貌而衆不生慢易焉故德輝動乎內而民莫不承聽理發乎外而衆莫不承順故曰致禮樂之道而天下塞焉舉而措之無難矣樂也者動於內者也禮也者動於外者也故禮主其減樂主其盈禮減而進以進為文樂盈而反以反為文禮減而不進則銷樂盈而不反則放故禮有報而樂有反禮得其報則樂樂

得其反則安禮之報樂之反其義一也

此因祭而推言禮樂之義也說見樂記

曾子曰孝有三大孝尊親其次弗辱其下能養公明儀問於曾子曰夫子可以為孝乎曾子曰是何言與是何言與君子之所謂孝者先意承志諭父母於道參直養者也安能為孝乎

此因祭以推孝親之義而引曾子之言以明之也曾子曰孝之等有三大孝必尊親之至其次期於弗辱



其下貴於能養分不同而心之自盡焉一也公明儀問於曾子曰若夫子者可以為孝乎曾子曰是何言與是何言與夫君子之所謂孝者必父母之意未形而能逆之於先父母之志已形而能承之於後蓋非苟順焉而已惟務有以諭之於道而後即安至如參乃直養者也安能為孝乎案為子者諭父母於道如為臣者格君心之非此忠孝之至

曾子曰身也者父母之遺體也行父母之遺體敢不敬

乎居處不莊非孝也事君不忠非孝也莅官不敬非孝也朋友不信非孝也戰陳無勇非孝也五者不遂裁及於親敢不敬乎

此言孝之在於能敬也遂猶成也曾子曰人之有是身也者乃父母所遺之體也所行為父母之遺體而求其弗辱庸敢不敬乎夫敬無所不在如於居處而有不莊非孝也於事君而有不忠非孝也於莅官而有不敬非孝也於朋友而有不信非孝也於戰陳而

或無勇非孝也五者一有不遂且將裁及於親而敢不敬乎案此言戰陳無勇與諭父母於道同意是故從親之令非所以為孝不惟其是而苟以自全亦非所謂守身者也

亨熟羶薌嘗而薦之非孝也養也君子之所謂孝也者國人稱願然曰幸哉有子如此所謂孝也已衆之本教曰孝其行曰養養可能也敬為難敬可能也安為難安可能也卒為難父母既沒慎行其身不遺父母惡名可

謂能終矣仁者仁此者也禮者履此者也義者宜此者也信者信此者也強者強此者也樂自順此生刑自反此作

此推極不辱之義而見能養之為小也羶牲屬薌穀屬稱願口稱而心願也然語辭衆之本教言孝為教衆之本即孝經德之本教之所由生之意也行猶用也為人子者若但亨熟羶薌之味先嘗而薦之非遂可為孝也是養也夫君子之所謂孝也者必其行成

於內國人咸稱願然曰幸哉有子如此誠所謂孝也已夫國人稱願咸有觀感興起之心可見衆之本教曰孝其用於事親則曰養養猶可能也敬其親為難敬猶可能也安於敬為難安猶可能也久於敬而有終為難雖父母既沒必慎行其身不至遺父母以惡名是則可謂能終而孝道盡矣夫孝為德之本而無所不統仁者仁此孝者也禮者履此孝者也義者宜此孝者也信者信此孝者也強者強此孝者也樂自

順此而致和以生刑自反此而得罪以作人其可不務孝乎案仁禮義信強皆性之德也而未有不原於孝者異氏無親則其本撥矣

曾子曰夫孝置之而塞乎天地溥之而橫乎四海施諸後世而無朝夕推而放諸東海而準推而放諸西海而準推而放諸南海而準推而放諸北海而準詩云自西自東自南自北無思不服此之謂也

此言孝道之大亦上文本教之意也放至準式也詩

文王有聲之篇曾子曰夫孝之道大矣置之則窮高厚而塞乎天地溥之則極廣遠而橫乎四海施諸後世則悠久無疆而無閒於朝夕是以得乎人心之所同然則推而放諸四海而人莫不以為準詩云自西自東自南自北無思不服此孝治天下之謂也案放之而準所謂皇建其有極是也中庸言脩道之教必稱舜之大孝武周之達孝者以此

曾子曰樹木以時伐焉禽獸以時殺焉夫子曰斷一樹

殺一獸不以其時非孝也

此申上仁者仁此之意也曾子曰仁本於孝故樹木必以時伐焉禽獸必以時殺焉夫子嘗曰斷一樹殺一獸而有不以其時即非孝也案孝為仁之實仁主於愛由親親而仁民由仁民而愛物分雖殊而理則一是故聖人以孝治天下而有餘也

孝有三小孝用力中孝用勞大孝不匱思慈愛忘勞可謂用力矣尊仁安義可謂用勞矣博施備物可謂不匱



笑父母愛之喜而弗忘父母惡之懼而無怨父母有過  
諫而不逆父母既沒必求仁者之粟以祀之此之謂禮  
終

此亦曾子之言即上孝有三之意也勞猶功也孝之  
等有三小孝則能養而用力中孝則弗辱而用勞大  
孝則尊親而不匱常思父母之慈愛而忘己之勞可  
謂用力矣尊重於仁安行於義功勞及物而令名歸  
親可謂用勞矣博施於民備物以祭而孝思無窮可

謂不匱矣至於心所自盡人人皆同如父母或愛之則喜而不能忘父母或惡之則懼而無敢怨父母或有過則諫而不敢逆迨父母既沒又必求仁者之粟以祀之此則能以禮終事其親者也案孝有大小猶云大德小德也孔疏以天子至庶人分位言之未是樂正子春下堂而傷其足數月不出猶有憂色門弟子曰夫子之足瘳矣數月不出猶有憂色何也樂正子春曰善如爾之問也善如爾之問也吾聞諸曾子曾子聞

諸夫子曰天之所生地之所養無人為大父母全而生之子全而歸之可謂孝矣不虧其體不辱其身可謂全矣故君子頃步而弗敢忘孝也今予忘孝之道予是以有憂色也壹舉足而不敢忘父母壹出言而不敢忘父母壹舉足而不敢忘父母是故道而不徑舟而不游不敢以先父母之遺體行殆壹出言而不敢忘父母是故惡言不出於口忿言不反於身不辱其身不羞其親可謂孝矣

此申言慎行其身之意也無人為大即孝經所謂天  
地之性人為貴也項當作跬一舉足為跬再舉足為  
步道謂正路徑謂邪徑游謂浮水昔樂正子春下堂  
而偶傷其足既數月不出而猶有憂色門弟子曰夫  
子之足已瘳矣乃數月不出猶有憂色何也樂正子  
春曰善矣夫如爾之問也善矣夫如爾之問也吾之  
聞諸曾子曾子聞諸夫子者有曰凡天之所生地之  
所養無如人為最大蓋吾身受性於天地而受形於

父母父母既全而生之而子能全而歸之斯可謂孝  
矣體為親之遺而能不虧其體身為親之枝而能不  
辱其身斯可謂全矣故君子雖跬步而不敢忘孝也  
今子傷足則已忘孝之道予是以有憂色也夫孝者  
必壹舉足而不敢忘父母壹出言而不敢忘父母惟  
壹舉足而不敢忘父母是故道焉而不徑舟焉而不  
游有不敢以先父母之遺體行於危殆之地者惟一  
出言而不敢忘父母是故惡言不出於其口忿言不

反於其身有不至於辱其身而羞其親者如此則可  
謂之孝矣案不虧體所以全形不辱身所以全性曾  
子之孝體其受而歸全易所謂原始反終故知死生  
之說也

昔者有虞氏貴德而尚齒夏后氏貴爵而尚齒殷人貴  
富而尚齒周人貴親而尚齒虞夏殷周天下之盛王也  
未有遺年者年之貴乎天下久矣次乎事親也

此因孝親而言弟長之義也尚謂有事尊之於其黨

也貴親者周之宗盟異姓為後也昔者有虞氏之所  
貴者德而所尚則在齒夏后氏之所貴者爵而所尚  
則在齒殷人之所貴者富而所尚則在齒周人之所  
貴者親而所尚則在齒夫虞夏殷周皆天下之盛王  
也而未有遺年者可見年之貴乎天下久矣以其次  
乎事親而弟實孝之推故也

是故朝廷同爵則尚齒七十杖於朝君問則席八十不  
俟朝君問則就之而弟達乎朝廷矣行肩而不併不錯

則隨見老者則車徒辟斑白者不以其任行乎道路而  
弟達乎道路矣居鄉以齒而老窮不遺強不犯弱衆不  
暴寡而弟達乎州巷矣古之道五十不為甸徒頒禽隆  
諸長者而弟達乎獫狁矣軍旅什伍同爵則尚齒而弟  
達乎軍旅矣孝弟發諸朝廷行乎道路至乎州巷放乎  
獫狁脩乎軍旅衆以義死之而弗敢犯也

此言弟道無往不達而天下化成也併竝行錯鴈行  
隨隨行四丘為甸六十四井也君田獵則起其民為



卒徒故曰甸徒春田為獫冬獵為狩五人為伍二伍為什尚齒之教通行於天下而倡始於朝廷是故朝廷之所重在爵爵同則以齒為序七十者立而據杖於朝君有問則為布席而使坐八十者君揖即退不待朝事之畢君有問則就於其家而弟達乎朝廷矣少者與長者同行肩相倚而不竝兄事之則錯而少差父事之則隨而在後途中若見老者無論乘車與徒步必避之以致敬斑白者皆有少者以代勞不以

其任而行而弟達乎道路矣居鄉惟以齒為尚即老而窮者亦所不遺強不至於犯弱衆不至於暴寡而弟達乎州巷矣古之道五十者不為甸徒所以惜其力田獵分禽長多於幼所以厚其恩而弟達乎獮狩矣軍旅之興以爵相統什伍之爵同則以齒為序而弟達乎軍旅矣夫孝弟之為教其發始乎朝廷行乎道路至乎州巷放乎獮狩脩乎軍旅者如此是以衆著於孝弟之義守死不變而弗敢以干犯也

祀乎明堂所以教諸侯之孝也食三老五更於大學所以教諸侯之弟也祀先賢於西學所以教諸侯之德也耕藉所以教諸侯之養也朝覲所以教諸侯之臣也五者天下之大教也

此廣明孝弟之道以起下文也先王行禮宗祀嚴父於明堂以配上帝所以追本始而教諸侯之孝也食三老五更於大學所以尊高年而教諸侯之弟也祀先賢於西學所以崇道德而教諸侯之德也耕藉以

供粢盛所以教諸侯之養也朝覲以來羣后所以教諸侯之臣也此五者乃天下之大教也

食三老五更於大學天子袒而割牲執醬而饋執爵而醕冕而總干所以教諸侯之弟也是故鄉里有齒而老窮不遺強不犯弱衆不暴寡此由大學來者也天子設四學當入學而大子齒

此申言教弟之義也天子之食三老五更於大學也始則親袒割牲以為俎實繼則親執醬以饋熟食畢

又親執爵以醕口且又端冕而總持干盾親立於舞位以侑食此所以尚齒而教諸侯之弟也是故鄉里咸知有齒而老窮不遺強不犯弱衆不暴寡此其俗化之成蓋皆由大學來者也天子設立四學以教人當入學之時雖大子亦必循少長之序而有不敢以貴加人者案周立四學鄭氏謂是四郊之虞庠方氏懋謂是四代之學即有虞氏之庠夏后氏之序殷之瞽宗周之辟雍陸氏佃謂四學并其中學而五南為

成均北為上庠東為東序西為瞽宗而辟雍則居中  
陸氏近是但辟雍宜居南成均宜居中耳

天子巡守諸侯待于竟天子先見百年者八十九十者  
東行西行者弗敢過西行東行者弗敢過欲言政者君  
就之可也

此即巡守以明尚齒之禮也天子巡守之時諸侯遠  
迎而待於竟天子必先見百年者若八十九十者東  
行則西行者弗敢徑過西行則東行者弗敢徑過而

必往見之如欲言政者君就其家而問之可也夫天子至尊巡守大典猶曲盡尊年之禮若此

壹命齒于鄉里再命齒于族三命不齒族有七十者弗敢先七十者不有大故不入朝若有大故而入君必與之揖讓而后及爵者

此即鄉飲以明尚齒之禮也壹命謂王朝之下士公侯伯之士子男之大夫再命謂王朝之中士公侯伯之卿齒謂以年次坐立也鄉飲酒之禮壹命尚舅故

序齒於鄉里再命稍尊但序齒於族人三命已尊則獨設一席於賓席之東雖宗族不得與之序齒然序進之時族有七十者則必先入而有所不敢先蓋齒至七十而致仕不有大故不入朝若有大故而入君必先與之揖讓而後及於在位有爵者即三命亦豈得而加之哉案鄭注不敢先族之七十者謂既一人舉觶乃入也雖非族亦然承齒乎族故言族爾

天子有善讓德於天諸侯有善歸諸天子卿大夫有善



薦於諸侯士庶人有善本諸父母存諸長老祿爵慶賞  
成諸宗廟所以示順也

此歷言讓善於所尊以明敬順之道也薦進也本者  
推而本之也存猶歸也自天子至於庶人皆以謙讓  
為貴天子為天所命有善必讓德於天諸侯為天子  
所命有善必歸諸天子卿大夫為諸侯所命有善必  
薦於諸侯士庶人乃父母長老之所教有善必本諸  
父母存諸長老其有祿爵慶賞必賜之於宗廟凡皆

以示民順也案示順者不忘所自而弗敢專蓋亦孝之德也

昔者聖人建陰陽天地之情立以為易易抱龜南面天子卷冕北面雖有明知之心必進斷其志焉示不敢專以尊天也善則稱人過則稱己教不伐以尊賢也

此申言天子之讓善也建者立於此而參於彼也易上謂易書下是官名即大卜也昔者聖人明於陰陽天地之情而作易以垂教占易者抱龜而立於南面

天子袞冕而立於北面雖自有明知之心必進而斷其志焉蓋示人以不敢自專所以尊天也卜吉為善善則稱人不吉為過過則稱己所以教人不自矜伐且尊敬賢人也案易以道陰陽而云抱龜者兼言卜筮也

孝子將祭祀必有齊莊之心以慮事以具服物以脩宮室以治百事及祭之日顏色必溫行必恐如懼不及愛然其奠之也容貌必溫身必詘如語焉而未之然宿者

皆出其立身靜以正如將弗見然及祭之後陶陶遂遂如將復入然是故慤善不違身耳目不違心思慮不違親結諸心形諸色而術省之孝子之志也

此覆言孝子享親之極其誠也宿者皆出謂賓助祭者事畢而出也陶陶遂遂相隨行之貌術述也孝子若將祭祀則必有齊莊之心以慮事而於以具其服物脩其宮室治其前後之百事及祭之日則顏色必溫行步必恐如親之將來而懼不及致其愛者然其

奠之也則容貌必溫身必誣如親之既來欲有所語而未之發者然助祭者皆出則其立卑靜以正如親之將往而弗及見者然及祭之後猶且陶陶遂遂如親之既往而將復入然是惟慤善不違乎身耳目不違乎心思慮不違乎親其天性之愛結諸心形諸色而每事述而省之正孝子事親之志也

建國之神位右社稷而左宗廟

此言尊神親祖之義也神無方人位之而有方故曰

建天子諸侯建國之神位其方所有一定而不可易者右則為社稷而左則為宗廟王氏曰右陰也地道所尊故右社稷左陽也人道所鄉故左宗廟


日講禮記解義卷五十一

謹案卷五十第十五頁後二行劉氏謂先日欲出之初是也刊本出訛以今改

卷五十一第十二頁後七行方氏懋刊本懋訛懋今改







覆校官編修臣方燾

校對官編修臣許兆椿

謄錄監生臣胡灝